

Puisi

Marzuki Ali

PERKASA BULAN II

Nian bulan
Perkasa bulan
Rebah aku
Di teluk malam
Runduk aku
Di tangga malam
Ngawur aku
Delima bulan

Resah diri
Dendam mendalam
Lemas kalbuku
Di samun walang
Tebaran kelam
Di lamunan bimbang
Gelisah sunti
Hanyut terbang

Usah kesalkan
Niat penghalang
Usah ditangisi
Kesal untungan
Usah bujukan
Halangan dendam
Meratib kesalan
Dalam berpegang

Nian bulan
Kekasih bulan
Terbujuk kesempingan
Tersamun rinduan
Dendam siapa
Dendam di mana
Bujukan siapa
Merana duka.

Disember 2023
Kuala Terengganu.

MENCARI SECUIL PENGELAMAN

Ajarkan aku untuk mengenal
Segala arah liku jalan
Ke gunung kalbu.

Dalam buta mata terbuka
Dalam denyut nafas mulut terngangga
Dalam sesat peta arah tuju
Sekalian pinta panduan.

Bukakan minda
Perhambakan diri
Belajar jadi seorang budak
Di suruh segala di taat dengan teguh
Biar berlari menyongsong berlawanan
Arus sungai songsang dan kaki luka
Biar erti menjadi ilmu mesra bersahabat!

Di ruang tertutup seperti terdedah
Di ruang ternganga seperti di padang terbuka
Di situ nanti kita bisa mengenal
Antara kita antara siapa
Bukan mencari tapi menemukan
Siapa kita hanya senya
Penunduk segala terhina.

Di hati tiada sesiapa
Kita kecil dan daif.

Julai 2023
Kuala Lumpur

Biodata Penulis.

Marzuki Ali

Penulis merupakan seorang penyair, pendeklamator dan aktivis teater sejak awal 1980-an. Kelahiran Kampung Kuala Kemaman Terengganu pada 20 Oktober 1945. Memiliki Sarjana Studi Dasar Teater dari Institut Kesenian Jakarta 1982. Pernah berkhidmat sebagai pensyarah Teater Sambilan di beberapa perguruan tinggi di Malaysia seperti di UITM, Shah Alam Akademi Seni Kebangsaan dan Akademi Seni Terengganu dan turut menjadi Karyawan Tamu di Universiti Sains Malaysia pada 2012. Beliau menghabiskan masa lebih dari 20 tahun mengembara hampir ke pelusuk Indonesia dan menghasilkan puluh kumpulan puisi dan kumpulan drama. Kumpulan puisi *Khazanah Segala Rimbun* (Penerbit USM 2011) memenangi Hadiah Sastera Perdana Malaysia (HSPM) 2010/2011 manakala kumpulan dekon *Saya dari Tanjung Penaga* (DBP 2015) turut memenangi Anugerah Sastera Perdana – Skrip Drama 2015/2016